


**TEZAU LITURGIC**

**10 OCTOMBRIE**

**SLUJBA  
SF.26 CUVIOȘI-  
MUCENICI  
DE LA  
ZOGRAFU-ATHOS**



**MINEIUL SFINȚILOR BULGARI  
ZOGRAFU-ATHOS, 2007**



# Мѣсяца Окто́врія въ 10-й дѣнь Служба святы́хъ два́дцать и шесть преподо́бному́чениковъ Зогра́фскихъ

## НА МАЛЪЙ ВЕЧЕРНИ,

На Го́споди воззва́хъ: **стихи́ры [на 4], гласъ 1.**

**Подобѣнь: Званнѣй свѣше.**

Озарившеся душа́ми и сердца́ми, отцы́ блаже́ннии, Божѣственною благода́тію и привре́менныхъ суету́ во у́мъ при́ймше, ми́ръ благоду́шно оста́viste и съ любо́вію при́досте въ Зогра́фскую обите́ль, и подвиго́мъ постни́чества обучи́вшеся, исповѣ́данія вѣне́ць при́ясте, престу́пники латиному́дренныя съ столпа́ твёрдо изобличи́вшеся, и огне́мъ испепели́вшеся отъ нихъ, преподо́бному́ченицы. **[Два́жды.]**

Утверди́вшеся, всеблаже́ннии, я́ко злосла́вныя, болѣ́зненную претерпи́сте отъ огня́ жесто́кую сме́рть, и всесожже́нія Иису́су принесо́стеся я́ко заколе́нія, благоуха́ниемъ испо́лнивши небѣ́сная. Тѣмже любо́вію празнуе́мъ па́мь ва́шу, святіи, моля́щеся моли́теся о чту́щихъ ва́съ всегда́.

Пѣ́сньми Божѣ́ственными да почита́ются ны́нѣ досто́йно Тома́ игу́мень, и Паро́еній, и сла́вннй Варсану́фій, Кирилль, Си́монъ, Михе́й, Са́вва,

Іовъ, Іаковъ, Косма́ и Иларіонъ, Кипріанъ и  
Мина́, Іосифъ и Іаковъ, Павелъ же и Сѣргій,  
купно со Анто́ніемъ, Іоаннікій божѣственный, и  
Евѡймій сла́вный, Мартиніанъ же и Дометіанъ,  
купно съ четы́рми иными, ихже па́мять ны́нѣ  
почита́емъ.

**Сла́ва, гла́съ то́йже. Самогла́сенъ:**

**Я**ко жи́знь ва́ша блаже́нна, и сме́рть честна́  
показа́ся войсти́нну, по благоче́сти бо ду́ши  
ва́ша презрѣ́вше, якоже бо тре́е о́троцы  
вещѣственному огню́ приобщи́стеся, и ны́нѣ со  
святы́ми жребі́й ва́шъ е́сть, идѣ́же и всели́стеся  
въ жили́ще неконча́емое, и моли́теся о душа́хъ  
нашихъ.

**И ны́нѣ.**

**На стиховнѣ́ стихіры, гла́съ 6:**

**П**охва́лимъ согла́сно двадца́тицу  
богоизбра́нную, купно со шестери́цею, обители  
нашея́ блюсти́тели, твѣрдья  
преподобнострада́льцы, прелести низложители,  
Правосла́вія же поборо́ники.

**Стихъ:** Честна́ предъ Го́сподемъ сме́рть  
преподобныхъ Его́.

**И**звлѣ́кше, треблаже́нни, якоже ме́чь  
духовный божѣственный глаго́ль, поськóсте  
главы́ враговъ латиномудренныхъ, и

всесожегшеса, благоухание Господеви  
принесостеса.

**Стихъ:** Проидохомъ сквозъ огнь и воду, и  
извелъ ны еси въ покой.

Съ лики ангельскими пребывающе и престолу  
Владычню предстояще, богоносни, съ ними  
прилжно молитеса, о еже спастися отъ бѣдъ,  
память вашу чтущимъ.

**Слава, и нынѣ. Подобенъ тойже:**

Троице нечислотосильная, Единице  
Тривостасная, молитвами твердыхъ Твоихъ  
страдальцевъ, и Приснодѣвы единыя  
Богородицы, спаси ны, воспѣвающія Тя.

**Тропарь, гласъ 1. Подобенъ: Камени**  
запечатану.

Житіе постничествомъ честно прошедше во  
обители Зографстѣй, полче преподобный, доблии  
отцы двадесять и шесть, жертву принесостеса  
Богу, твердымъ во огни мудрованіемъ  
благочестія. Тѣмже и пріясте сугубый вѣнецъ отъ  
Господа Бога, славу Вѣнчавшему васъ  
возсылающе.

**Слава, гласъ 4:**

Честни преподобномученицы днесь, по долгу  
чтуще, восхвалимъ лѣтній празникъ вашъ, яко  
благихъ намъ виновный, и всенощная

совершающе, поемъ: Духа проповѣдницы, Троицы вѣрнии служителіе, теплѣ молитесь о насъ ко Господу.

### **И нынѣ:**

**Е**же отъ вѣка утаенное, [и ангеломъ несвѣдомое таинство: Тобою, Богородице, сущимъ на земли явися, Богъ въ неслитномъ соединеніи воплощаемъ, и крестъ волею насъ ради воспріимъ, имже воскресивъ перевозданнаго, спасе отъ смѣрти души наша].

### **НА ВЕЛИЦѢЙ ВЕЧЕРНИ,**

[**Б**лаженъ мужъ, **1-й антифонъ.**] **На Господи**  
воззвахъ: **стихиры на 8, гласъ 4-й.**

**Подобенъ: Я**ко дѣбля.

**П**разднолюбцевъ соборы, монашествующихъ [сословіе], веселящися, праздникъ составимъ преподобнострадальцевъ, и пѣсни Христу возслѣмъ, укрѣпившему ихъ, избличити безуміе лютаго царя Михайла и Вѣкка патріарха, вознействовавшія злославно, на стадо Матере Божія.

**В**сечестныя угодники Пречистыя Богоматере, обители же Зографскія свѣтлоплодная древеса, и шипцы бсеблагоуханныя, и честныя хранители, двадѣсять и шѣсть сущія числомъ, почтимъ божественными пѣснями, обличившія прелесть

злосла́вныхъ, и огне́мъ искуше́нныя, я́ко зла́то  
чистѣ́йшее.

**Т**ома́ пресла́вный, и божество́нный Паро́еній,  
Симо́нъ, Варсану́фій, Іовъ, Кири́ллъ, Михе́й,  
Са́вва, Іако́въ, Косма́, Иларіо́нъ же и Домети́анъ,  
Мина́, Па́вель, и Серге́й, и Анто́ній, Марти́ніанъ  
же со Іоани́кіемъ, и с про́чіею осмери́цею,  
пѣ́снями по до́лгу да восхва́ляются.

**Т**ве́рдіи преподо́бнострада́льцы, по́лче  
божество́нный Всеца́ря, огня́ не убоя́вшеся,  
два́десять и ше́сть, и отъ Бо́га благосла́внѣйше  
вѣнча́вшеся, лику́ете въ черто́зѣхъ небесныхъ, и  
Зогра́фскую преслову́тую обитель покрыва́ете  
отъ вся́кихъ бѣ́дъ, я́же соверша́етъ святу́ю  
па́мь ва́шу, стяжавши ва́съ предхраните́лями.

## **Ины стихи́ры святы́хъ, гласъ 2. Подобенъ:**

**К**іими похва́льными.

**К**іими похва́льными пѣ́снями восхва́лимъ  
благочестномудре́нно, преподо́бномученики  
днесъ, и исповѣ́дники два́десять и ше́сть, я́ко  
благочесті́я поборо́ники: о́выя у́бо, я́ко обители  
Зогра́фскія предначальники, о́выя же, я́ко купно  
со инѣ́ми потруди́вшіяся въ сло́въ вѣ́ры и въ  
постническихъ трудѣ́хъ, и пострада́вшія съ  
ни́ми, я́же вѣнча́ Госпо́дь, имѣ́й вѣлю́ ми́лость.

**К**іими духо́вными словесы́, похва́лимъ  
богоно́сныя и преподо́бнострада́льныя два́десять

и шѣсть, мученическою кончиною заше́дшія, на столпѣ испепелѣнныя: Ѳому́, Зографской обители предсѣдательствовавшаго, Іова, Варсану́фія, Іакова, Са́вву, Парѳе́нія и Косму́, съ прѣчими, обличившія прѣлесть папослужителей, и вѣнцы небесныя достойно пріимшія отъ руки Божія.

**К**іими весѣлыми пѣсньми, воспоймъ ликъ преподобныхъ, собравшіяся благодатию, во еди́но согла́сіе вѣры, твѣрдья вѣры предограждѣнія, Троицы побѣорники и служители, свѣтильники, вселенную просвѣщающія, церковныя столпы, яже вѣнцы славы вѣнча́ Троица, яко́ Духа проповѣдники, и духобѣорцевъ обличители.

**В**сякое ни во что́же положи́те прещѣніе латинъ злославныхъ, прѣлесть зломрачную обличите, на столпѣ стояще́ двадѣсять и шѣсть твѣрдіи отцы́, Духа отъ Отца́ исходяща, яко́же рече́ Спа́съ, му́дрии, исповѣдавшие, и блаженную кончину́ огнемъ пріимше, вѣнценосцы на небеса́ възидѣте, сла́вни, о всѣхъ ны́нѣ молящесе́.

### **Сла́ва, гла́сь 6:**

**П**риидите днесъ, ликъ духовный составльше, во обители Зографстѣй, благочестно торжествуемъ, и сла́вныхъ преподобнострадальныхъ отцевъ, двадѣсять и шѣсть числомъ сущихъ, честное торжество́, сла́вно почтѣмъ, глаголюще: ра́дуйся,

по́лче богособранный, шумя́щаго огня́ не  
убо́явше́йся, и злосла́вныхъ брѡвь низложивше́й;  
ра́дуйте́ся, посреде́ огня́, я́коже въ Вавило́нѣ  
о́троцы, па́пскій о́бразъ поплева́вши, и  
равночестно Трѡи́цу проповѣ́давши; ра́дуйте́ся,  
Боже́ственнаго Ду́ха свѣ́тліи изъясни́тели, и  
чи́стаго Правосла́вія учи́телие. Ангели  
бѣлоно́сяще, главы́ ва́ша вѣнча́ша, и вѣрніи  
возвесели́шая, утвержда́еми на основа́ни  
и́стины. Но, о до́бли ору́жницы Христо́вы,  
предста́тели Зогра́фскія оби́тели, и бо́дри  
храните́ліе, моли́теся о на́съ, соверша́ющихъ  
ва́шу па́мять!

### **И ны́нѣ, богоро́диченъ:**

**К**то Тебѣ́ не ублажи́тъ, [Пресвята́я Дѣ́во? Кто  
ли не воспое́тъ Твоего́ Пречи́стаго Рожде́ства?  
Безлѣ́тно бо отъ Отца́ возсія́вый Сынъ  
Единоро́дный, Тойже отъ Тебе́, Чи́стыя, про́йде,  
неизрече́нно вопло́щся: естество́мъ Бо́гъ Сый и  
естество́мъ бы́въ Человѣ́къ на́съ ра́ди; не во  
двою́ лицу́ раздѣ́ляемый, но во двою́ естеству́  
неслѣ́тно познава́емый. Того́ моли́, Чи́стая  
Всеблаже́нная, поми́ловатися душа́мъ на́шимъ].

### **Вхо́дъ. Прокі́мень дне́ и чте́нія три. Прему́дрости Соломо́ни чте́ние.**

**П**ра́ведныхъ ду́ши въ руцѣ́ Бо́жіей, и не  
прико́снется ихъ му́ка. Непщевáни бы́ша во

очесѣхъ безумныхъ умерети, и вмѣнися озлобленіе исходъ ихъ, и еже отъ насъ шествіе — сокрушеніе, они же сѹть въ мирѣ. Ибо предъ лицемъ человѣческимъ, аще и муку пріимуть, упованіе ихъ безсмертія исполнено. И вмалѣ наказани бывше, великими благодѣтельствовани бѹдутъ, яко Богъ искуси я и обрѣте ихъ достойны Себѣ. Яко злато въ горнилѣ, искуси ихъ и, яко всеплодіе жертовное, пріятъ я. И во время посѣщенія ихъ, возсіяютъ, и яко іскры по стѣблю, потекутъ. Судятъ языкомъ и обладаютъ людьми, и воцарится Господь въ нихъ во вѣки. Надѹющіися Нань разумѹютъ истину и вѣрніи въ любви пребудутъ Емѹ, яко благодать и милость въ преподобныхъ Его и посѣченіе во избранныхъ Его.

### **Премудрости Соломѹни чтеніе.**

**П**раведницы во вѣки живѹтъ, и въ Господѣ мзда ихъ, и попеченіе ихъ у Вышняго. Сего ради пріимутъ царствіе благолѣпія и вѣнецъ доброты отъ руки Господни, зане десницею покрыетъ я и мышцею защититъ ихъ. Пріиметъ всеорѹжіе — рвеніе свое и воорѹжитъ тварь въ мѣсть врагомъ. Облечетъся въ броня правды и возложитъ шлемъ — судъ нелицемѣренъ. Пріиметъ щитъ непобѣдимый — преподобіе, поостритъ же напрасный гнѣвъ — во оружіе, споборетъ же съ нимъ мѣръ на безумныя.

Пойдутъ праволучныя стрѣлы молніины и, яко отъ благокругла лука облаковъ, на намѣреніе полетятъ, и отъ каменомѣтныя ярости исполнь падутъ грады. Вознегодуетъ на нихъ вода морская, рѣки же потопятъ я нагло. Сопротивъ станетъ имъ духъ силы и, яко вихоръ, развѣетъ ихъ, и опустошитъ всю зѣмлю беззаконіе, и злодѣйство превратитъ престолы сильныхъ. Слышите убо, царіе, и разумѣйте, навѣкните, судіи концевъ земли. Внушите держащии множества и гордящися о народѣхъ языковъ, яко дана естъ отъ Господа держава вамъ и сила отъ Вышняго.

### **Премудрости Соломоновы чтеніе.**

**П**раведникъ, аще постигнетъ скончатися, въ покой будетъ. Осудитъ же праведникъ умираяи живущія нечестивыя. Узрятъ бо кончину праведнаго и не разумѣютъ, что совѣщаща о немъ, яко повержетъ Господь нечестивыя безгласны ниць и поколеблетъ ихъ отъ основаній, и до послѣдняго исчезнутъ въ болѣзни, и паметъ ихъ погибнетъ. Придутъ бо въ помышленіе согрѣшеній своихъ ужасни, и обличитъ ихъ сопротивъ беззаконія ихъ. Тогда станетъ въ дерзновеніи мнозъ праведникъ предъ лицемъ оскорбившихъ его и отметающихъ труды его. Видѣвше же его, смятутся страхомъ многимъ и ужаснутся о преславномъ спасеніи

его. Реку́тъ бо въ себѣ́, ка́ющесе, и въ тѣ́снотѣ́  
ду́ха воздо́хнутъ и реку́тъ: се́й бѣ́, его́же имѣ́хомъ  
нѣ́когда въ посмѣ́хъ и въ притчу́ поноше́нїя,  
безу́мнїи, житїе́ его́ вмѣ́нїхомъ неї́стово и  
кончи́ну его́ безче́стну. Ка́ко вмѣ́нїся въ сы́нѣхъ  
Бо́жїихъ, и во свѣ́тыхъ жре́бїй его́ е́сть? У́бо  
заблуди́хомъ отъ пу́ти і́стиннаго, и пра́вды  
свѣ́тъ не облиста́ намъ, и со́лнце не возсія́ намъ.  
Беззако́нныхъ испо́лнихомся сте́зь и поги́бели, и  
ходи́хомъ стези́ непрохо́дны, пу́ти же Госпо́дня  
не разумѣ́хомъ.

**Та́же на литїи стихи́ры [ищи́ въ Миней].**  
**На стиховнѣ́ стихи́ры, гласъ 5. Подобенъ:**  
**Ра́дуйся.**

**Ра́дуйся,** Зографскїя обители полче  
божественный, побѣдоносное ополченїе, столпы  
благочестїя, и ратоборцы на враги  
непримиримыя, тверди и неустрашимїи,  
прелесть латїнъ дерзновеннѣйше обличивши, и  
Михайла суетнаго царя Византїйскаго, и съ  
нимже и Векка безумнаго, иже предаша стадо  
Христово львомъ, посрамивши, на столпъ  
стояще, и зло тыя укоряюще; тѣмже молитесь  
Спасу дати намъ велию милость.

**Стихъ:** Честна́ предъ́ Господемъ, смѣ́рть  
преподобныхъ Его́.

**Р**а́дуйте́ся, побѣдоно́сное мно́жество, въ священной бра́ни до́блествовавши, и вѣне́ць отъ Го́спода ра́достно прі́явши, и блаже́нных неизрече́нную сла́ву зря́щи, и прича́стіемъ Бо́га обожа́емии, пѣ́сни не веще́ственныхъ серафимъ подража́ющии, и непосредственное о ми́рѣ моле́ніе творя́щи, и содѣ́лавшіяся хра́мы Свята́го Ду́ха, и таи́нь висо́каго Бо́жия ра́зума, самозрители́ су́ще, Христа́ проси́те, низпосла́ти душамъ на́шимъ ве́лю ми́лость.

**Стихъ:** Воспойте Го́сподеви пѣ́снь но́ву, хвале́ніе Его́ въ це́ркви преподо́бныхъ.

**Р**а́дуйся, Ѳомо́, па́стырю честны́я обители Зографскія, Варсану́фіе, Кирилле, Михее, Симо́не и Савво, Иларіо́не и Іове, Марти́яне же и Іа́кове, Космо́ и Анто́ніе, Іосифе и Евѳиміе, Ми́но и Па́вле, Іоани́кіе и Сѣ́ргіе, Дометі́ане, Парѳе́ніе и Кипри́ане, и другі́й Іа́кове съ четы́рми ины́ми. Два́дцать и ше́сть до́бли и сла́вни преподо́бномученицы, ва́сь по до́лгу похваля́юще мо́лимъ, моли́тесь о на́съ.

### **Сла́ва, гла́сь 5:**

**В**есели́тся дне́сь Христо́ва Це́рковь, крася́щися до́брыми хра́брствами преподо́бномучениковъ, и созыва́етъ всѣхъ, въ безмо́лвіи и въ общежи́тіи подви́зающихся: при́идите, глаго́люще, сра́дуйте́ся мнѣ́, ве́сь избра́нный Изра́илю,

просвѣти́ бо Госпо́дь сла́ву мою́, обнаживъ ху́лу злосла́вныхъ на Пресвята́го Ду́ха, ю́же преподо́бнии сіи страда́льцы, на высотѣ́ стоя́ще, дерзнове́нно обличи́ша. Имже и мы́ благода́рно прирце́мъ: не преста́йте, святіи, я́ко дерзнове́ніе иму́ще ко Христу́, ва́съ прославльшему, моли́тся о оби́тели се́й на́шей, въ не́йже по́стническія по́двиги ва́ша, и муче́нія по́прище соверши́сте, е́же умири́ти міръ, и спасти́ ду́ши на́ша.

### **И ны́нѣ, богоро́диченъ:**

**Хра́мъ** и Две́рь [еси́, Пала́та и Престо́ль Царе́въ, Дѣ́во всечестна́я, Ею́же Изба́витель мо́й, Христо́сь Госпо́дь, во тмѣ́ спя́щимъ яви́ся, Со́лнце сый пра́вды, просвѣ́тити хотя́, я́же созда́ по о́бразу Своему́ руко́ю Своею́. Тѣ́мже, Всепа́тая, я́ко Ма́терне дерзнове́ніе къ Нему́ стяжа́вшая, непреста́нно моли́, спаси́ся душа́мъ на́шимъ].

**[На благослове́ніи хлѣ́бовъ: Тропа́рь  
святы́мъ, два́жды. И Богоро́дице  
Дѣ́во.., еди́ножды.]**

## НА УТРЕНИ,

**На Богъ Господь: Тропарь святымъ 1-й. Слава,  
2-й. И нынѣ, богородиченъ.**

**По 1-й стихологии съдаленъ, гласъ 1.**

**Подобенъ: Гробъ Твой, Спасе.**

**Мученики** Христо́вы и преподо́бныя отцы́, че́стно почти́мъ, я́ко храни́тели на́ша, предста́тели же неусы́пныя и блюсти́тели су́щія; сїи бо прелесть латиномудренныхъ мужественно обличивше, огнемъ божественныя кончины добръ сподобишася.

**Слава.** Свѣтлы звѣзды Христо́вы Цѣркве явистеся, мудрии, ученія лучами и страданіи свѣтлостьми сію озаряюще, отцевъ бо изъясните ученія. Тѣмже днесъ священную ва́шу па́мь вѣрно празднуемъ.

**И нынѣ.** Дѣва воистинну, прѣжде рождества́ Дѣво, Дѣва истинная, въ рождествѣ́ Дѣво, Дѣва, Приснодѣво по рождествѣ́ пребыла́ еси́. Тѣмже молю́ся, я́ко Матере-Дѣва еси́, дѣвствовати мя́ душею́ и тѣломъ, Отрокови́це Дѣво, укрѣпи́.

**По 2-мъ стихословіи съдаленъ, гласъ 4.**

**Подобенъ: Удивися Іосифъ.**

**Удивися,** воистинну, а́нгельское во́инство, мужеству́ мудрыхъ преподобнострада́льныхъ отцевъ, ка́ко на столпѣ́ стоя́ще, беззаконную́ща царя́ обличи́ша, и Ве́кка люта́го, и кардина́лы,

испепелившеся, претерпѣша доблественно, якоже иному нѣкому страждущу! Тѣмже вѣнцы неувядаемыми Христось сѣхъ вѣнча.

**Слава.** Удивляетъ всякъ умъ твердость мужества вашего, преподобнострадальцы Христовы, обители Зографскія доброто, яко доблемудренно, побѣдивши папослужителей, и поплевавши гордость и суетныя ихъ совѣты, совершивши добръ божественное поприще. Сего ради, священную вашу память совершающе, теплыхъ представителей васъ, всехвалянии, имамы.

**И нынѣ.** Ангеловъ радость, безплотныхъ доброта, спасеніе чловѣковъ и свѣтозареніе вѣрныхъ — Ты еси, Богородице. Тѣмже Тя, вѣрно ублажаемъ, чтуще Тя, Чистая, яко Богоотроковицу; отъ всякія нѣжды избави рабы Твоя, благословенная Богоневѣсто, сподобляющи небесныхъ и вѣчныхъ благъ.

**[По поліелѣи величаніе святымъ:]**

Ублажаемъ васъ, святіи преподобномученицы, и чтѣмъ святую память вашу, наставницы монаховъ, и собесѣдницы ангеломъ.

**Псаломъ избранный:** Богъ намъ прибѣжище и сила...]

## По поліеліи сѣдаленъ, гласъ 4. Подобень:

Явился еси.

Свѣтліи адаманты Православія, во огни временномъ искушеніи терпѣливо, да похвалятся днесь, яко Троицы бѣвше проповѣдницы.

**Слава.** Празднуеть днесь обитель Зографская, честное торжество преподобнострадальцевъ своихъ, сіи бо проповѣдаша Православія божественныя догматы.

**И нынѣ.** Предстательнице неборимая оскорбляемыхъ, и теплое заступленіе уповающихъ на Тя, отъ бѣдъ мя избави, Ты бо еси всѣхъ помощница.

**Степенна, 1-й антифонъ 4-го гласа.** [Прокимень, гласъ 4:] Честна предъ Господемъ\* смѣрть преподобныхъ Его. [**Стихъ:** Что воздамъ Господеви о всѣхъ, яже воздаде ми?] **Евангеліе отъ Луки, зачало 24.**

## По 50-мъ псалмѣ стихира самогласна, гласъ 2:

Вмѣсто тлѣнныхъ и преходящихъ, нетлѣнная и пребывающая возлюбивше, и вмѣсто земныхъ небесная предпочѣтше, преподобнострадальнии отцы, чтуще васъ, отъ варварскихъ находженій, и разбойническихъ нападѣній и нашествій

избавите, молимся, да присно почитаемъ память вашу всечестную.

**Канонъ Богородицы со ирмосомъ на 6 и святыхъ два.**

**[Канонъ] первый, егоже краегранесие: Полкъ красныи преподобныхъ похвалю. Иаковъ.**

**Гласъ 1.**

**Пѣснь 1.**

**Ирмосъ:** *Христось раждается — славите! Христось съ небесъ — срящите! Христось на земли — возноситесь! Пойте Господеви, вся земля, и веселиемъ воспойте, людие, яко прославися.*

**Честныхъ** преподобномучениковъ торжество, радующеся днесь, Зографскія обители монашествующи, совершимъ и Господу прилжно помолимся, яко да молитвами сихъ, небесныя радости сподобимся.

**Сынове** Божии по причастію бысте, тверди преподобнострадальцы, латинъ же гнилюю прелесть злославія изобличивше, и огнемъ испепелившеся, сугубымъ вѣнцемъ отъ Христа вѣнчаетеся.

**Ума** твердостію, славнии, Духа отъ Отца исходяща, якоже Спасъ рече, тако исповѣдавше, паписты яко нововводящія, изобличисте, мудрии, и посрамисте.

**Богородичень:** Божію гору, отъ неяже отсѣчеся камень краеугольный, въ соединеніи приводяй неизреченное, прѣжде разстоящая, истинную Божію Матеръ, яко виновную нашего исправленія, почтимъ.

**Инъ канонъ святыхъ, гласъ 4:  
Пѣснь 1.**

**Ирмосъ:** *Отверзу уста моя, и наполнятся Духа, и слово отрыгну Царицу Матери, и явлюся, свѣтло торжествуя, и воспою, радуясь, Тоя чудеса.*

Скверными устнами восхвалити произволивъ божественное собраніе преподобнострадальцевъ Христовыхъ, молю Тя, Спасе, дати ми слово и благодать, соплесті тѣмъ похвалу.

Похвалимъ днесь преподобнострадальцевъ сочетаніе, двадесять и шесть, твердыхъ адамантовъ, обличившихъ злочестіе латинъ и смѣрть неправедную претерпѣвшихъ.

Пастырь изряднѣйшій Ѳома достойно да почтитя днесь, и божественный Іаковъ, и Варсануфій, Симонъ, Кирилль, Мина и Киприанъ, со всѣми иными да возвеселятся.

**Богородичень:** Свѣта невечерняго источникъ, вѣдуще Тя, Всепѣтая, мракъ душъ и тѣлесъ разрѣши лучами Твоими, и зрѣти сподоби Того, Владычице, молимся.

### ПѢСНЬ 3.

**Ирмосъ:** Прѣжде вѣкъ отъ Отца́ рождѣнному нетлѣнно Сы́ну и въ послѣдняя отъ Дѣвы́ воплощенному безсѣменно, Христу́ Бо́гу возопи́мъ: вознесы́й ро́гъ нашъ, Святъ еси́, Го́споди.

Пѣсньми божѣственными да похва́лится божѣственное сослѣвие́ священныхъ преподобномучениковъ обители́ Зографскія, сугубымъ бо вѣнцемъ вѣнчашася, яко постницы́ и твѣрдіи страдальцы́ суще, треблаженніи.

Разумомъ твѣрдѣйшимъ Михей́ и Симонъ́ доблествоваша, со Иларіо́номъ и Кирилло́мъ, Евѣиміемъ и всѣми двадѣцать и шести́ми, ихже́ днѣсь восхваляюще въ радостныхъ пѣснѣхъ, Го́спода сла́вимъ.

Единотерпѣніе во мно́зѣхъ тѣлесѣхъ показавше преподобнострадальніи отцы́ обители́ Зографскія, латины́ лютыя посрамиша, и вѣнцы́ побѣдными главы́ ихъ вѣнчашася.

**Богородиченъ:** Неизречѣнный образъ зачатія́ и рождѣнія́ Твоего́, Богородице́ Дѣво, необы́меннаго бо всѣми Сы́на Божія́ зачала́ еси́, и безъ сѣменно ро́ждши, Чистая́, пребываеши́ Приснодѣ́ва.

## Инь.

**Ирмо́сь:** Твоя́ пѣсносло́вцы, Богоро́дице, живы́й и незави́стный Исто́чнице, ли́къ Себѣ совоку́пльшия, духо́вно утверди́, въ боже́ственнѣй Твоей сла́вѣ, вѣнцевъ сла́вы сподо́би.

**А**нгелы удиви́ боже́ственный ли́къ преподо́бныхъ, претерпѣ́въ о́гненное на столпѣ́ сожже́ніе, де́моны же посрами́шася, вѣ́рнии же до́блести ихъ ра́достно похва́лиша.

**В**ельми́ просла́ви ва́сь Христо́сь, отцы́ всечестніи, и на небеси́ и на земли́, яко́ по́стничествовавшихъ пре́жде, послѣ́ди же пострада́вшихъ, тѣ́мже почита́емъ днесь благознамені́тую па́мять ва́шу.

**Д**а воспое́тся Па́вель и Са́вва, Марти́ианъ же твѣ́рдый, и Се́ргій съ Си́мономъ, и Домети́анъ купно со всѣ́ми, яко́ обличивши́ лати́нское безу́міе.

**Богоро́диченъ:** Видѣ́ти свѣ́та Твоего́ лучи́, сподо́би, Влады́чице Чі́стая, любви́ю къ Тебѣ́ припада́ющія, воздержані́емъ и прилѣ́жнымъ моле́ніемъ, разрѣ́шивши́ мракъ страсте́й глубочайші́й.

## **Съдаленъ, гласъ 8. Подобень: Премудрости.**

**Крестъ** Христо́въ на ра́мо взѣмше, блаже́ннии отцы́ два́десять и ше́сть, по́стничествомъ къ нему́ прилѣписте́ся, но вра́гъ, завидя́й добродѣ́тельному житію́ ва́шему, воздви́же на вы́ суровы́я лати́ны, мня́ осла́бити по́стництва ва́шего твѣрдостъ, но обли́чися то́го ухищре́ние, я́ко изряднѣ́йше пострада́вше, моли́теся Христу́ Бо́гу прегрѣ́шеній оставле́нію дарова́тися, праздную́щимъ любви́ю святу́ю па́мять ва́шу. **[Дважды.]**

## **Слава, тойже. И нынѣ, богородиченъ:**

**Солнцезра́чная** колесни́це Дави́дова, порфи́ропосла́нный о́дръ Соломо́новъ, сви́токъ богоначертанны́й Исаи́нъ, и одушевле́нная ски́ня Моисе́ева, и стѣна́ адама́нтская Аммо́сова, Ты́ была́ еси́, свѣти́льникъ златокова́нный Заха́ріевъ, Дани́лова же гора́, дщи́ца желтобѣ́лая Авваку́мова, и превосхо́дное проро́ковъ оглаше́ние. Моли́ся Сы́ну Твоему́ и Бо́гу, прегрѣ́шеній оставле́ние дарова́ти, благоговѣ́йно покланя́ющимся божѣ́ственному образу́ Твоему́.

## **Пѣснь 4.**

**Ирмосъ:** *Жѣзль изъ ко́рене Иессе́ева и цвѣ́тъ отъ него́, Христѣ́, отъ Дѣ́вы прозяблѣ́ еси́, изъ горы́, Хва́льный, приосѣ́ненныя ча́щи пришѣлѣ́*

еси́, вопло́щся отъ Неискусому́жня, Невеще́ственный и Бо́же, сла́ва си́ль Твое́й, Го́споди.

**В**еду́щею стезе́ю къ жи́зни по́стнически шествова́вшие, страда́льческое благосла́вие улу́чйша, два́десять и ше́сть Зогра́фскія оби́тели отцы́, обли́чйше му́жественно преле́сть Миха́йла безбо́жнаго.

**Т**ле́нную сла́ву и пи́щу отцы́ оста́вльше, во оби́тели Зогра́фстѣй подви́заете́ся и лати́номъ твёрдо сопроти́вляюще́ся, чтѣти прину́ждающимъ ри́мскаго бо́га, и же́ртвы огне́мъ соверше́нныя Бо́гу принесо́стесе.

**Г**лаго́лы свяще́нными, пѣть бу́ди Тома́ свяще́ннѣйшей, оби́тели Зогра́фскія игу́мень, и вси́ иже съ ни́мъ, на высотѣ́ столпа́ посра́мивши лати́номудре́нныя враги́, и Ве́кка злочестѣ́ваго, я́ко нововво́дящія злоупотре́бленія.

**Богородиче́нь:** Врата́, ши́ршая небесе́ и престо́ль вѣмы́ Тя, серафимъ́ превѣ́сшую, Всечѣ́стая, Е́гоже бо вся́ческая не вмѣ́щаютъ я́ко Бо́га, вмѣ́стила еси́ и но́сиши на объ́ятїихъ я́ко Младе́нца, на престо́ль Отче́мъ естество́ на́ше Посади́вшаго.

**Инь.**

**Ирмосъ:** *Неизсле́дный Бо́жий сове́тъ, е́же отъ Дѣ́вы вопло́щенія Тебе́, Вы́шняго, проро́къ*

Авваку́мъ, усмотря́я, зовя́ше: сла́ва си́ль Твое́й, Го́споди.

**В**озвесели́мся духо́вно, па́мьць соверша́юще благознамени́тую, преподобнострада́льцевъ, и честны́хъ наста́вниковъ обители на́шея, моли́твами тѣхъ отъ лю́тыхъ избавляеми.

**К**расу́йся ны́нѣ, божественная обитель Зографская священными твоими отраслями, преподобнострада́льцами двадесять и шестью́, папослужителей злочестивыхъ, съ высоты́ столпа́ посрамившими.

**М**ужествомъ и благодатию укрѣпился полкъ преподобныхъ, упраздни коварства безплотныхъ враговъ, и папистовъ низложи бядословіе, нечестія исполненное.

**Богородичень:** Чи́стая безневѣстная, Ма́ти Бо́жія, спасай Твое́ стадо безвредно отъ всякаго зла́ и лю́тыхъ наведе́нія, Тя́ бо во обстояніихъ има́мы рабы́ Твой́ избавле́ние.

### **Пѣснь 5.**

**Ирмосъ:** Бо́гъ Сый ми́ра, Оте́ць щедро́тъ, вели́каго Совѣ́та Твоего́ Ангела, ми́ръ подава́юща, посла́лъ еси́ намъ; тѣмъ, богоразу́мія къ свѣ́ту наста́вльшеся, отъ но́щи у́треннююще, славосло́вимъ Тя́, Человѣколю́бче.

**С**илою догматовъ, мудрии, латинъ злославие, первѣе отразисте, таже огнемъ отъ нихъ сожжени бысте, и жертвы Господеви, принесостеся усердно, со ангельскими лики нынѣ ликующе, приснопамятнии.

**П**реподобно стадо твое упаслъ еси, Оомо, Зографскія обители пастьрю изряднѣйшій, и пострадалъ еси съ божественными, блаженне, ученики твоими отъ латиномудренныхъ, огнемъ искушени бывше яко злато въ печи, и со ангелы нынѣ ликовствуете.

**Р**евнителіе Господни явльшеся, премудрии, глаголющія на высотѣ неправедная обличисте, всеподобнии, заградивше тѣхъ уста премудро изъясненіемъ Писаній, тѣмже вси днесь память вашу празднуемъ.

**Богородичень:** Слово Божіе, Дѣво, сущее со Отцемъ, паче ума, отъ чистыхъ кровей Твоихъ воплотися неизмѣнно, якоже благоволи, Егоже во едину впостась, въ двухъ естествахъ, и дѣйствахъ, и хотѣніяхъ, православно мудрствуемъ.

**Инъ.**

**Ирмосъ:** Ужасошася *всяческая* о Божественнѣй *славъ* Твоей: Ты бо, *неискусобрачная* Дѣво, *имѣла еси во утробѣ*

*надъ всѣми Бѣга, и родила еси Безлѣтнаго Сына, всѣмъ, воспѣвающимъ Тя, мѣръ подающая.*

**Т**лѣнную и удобоувядаемую житія красоту, преподобніи отцы, познавше, Христовою любовію уязвѣстеся, нынѣ же неизреченныя радости въ Божественныхъ селеніихъ наслаждаетесь, блаженніи.

**И**стинно нынѣ возсія свѣтъ Божественныя благодати, истинно днесь нетлѣнная пища, житноточная манна, предлагається намъ, свѣтлая пѣмь божественныхъ предстателей нашихъ; желающіи насладитесь.

**Б**езсмертное благославіе купѣте, славніи, кончиною привременнаго огня, малая на великая измѣнившя. О, купѣте премудрыя! Тѣмже нынѣ радуетесь съ преподобными и мученики.

**Богородичень:** Свѣтильниче свѣтлый Свѣта пѣрваго, просвѣти дѣшу мою несвѣтлую свѣтомъ Твоимъ, да паки Свѣтъ узрю пѣрвѣйшій, Иже отъ Тебѣ просвѣти насъ, и Тебѣ, мою Просвѣтительницу, сіе бо свѣта свойство.

## **Пѣснь 6.**

**Ирмосъ:** Изъ утробы Іону младенца изблева морскій звѣрь, якова прѣятъ; въ Дѣву же всельшееся Слово и плоть прѣемшее прѣйде, сохранившее нетлѣнну: Егѣже, бо не пострадала истлѣнія, Рѣждшюю сохрани неврежденну.

**Д**несь намъ радостный день наста, свѣтло освѣщающъ — благознаменитый праздникъ двадесять и шести преподобныхъ, и веселитъ мысленно души же и сердца всѣхъ благодатию Духа, Егоже въ пѣсняхъ достодо́лжныхъ почита́емъ.

**Д**а живо́тъ вѣ́чный, премудри, на небесѣхъ получи́те, преда́те огню́ временно́му тѣлесу́, избличивше злосла́віе латинъ. Тѣмже днесь раду́ющеся, торже́ство ва́ше соверша́емъ.

**О**, ли́че честныхъ преподобныхъ приснопа́мятный! Вѣ́рно почита́емъ васъ и воспѣва́емъ вѣ́рою, зову́ще: почита́ющія васъ изба́вите ны́нѣ отъ всякія скорби, бѣды и озлобле́ній, да благоговѣ́нно въ пѣсняхъ торже́ство ва́ше соверша́емъ.

**Богородичень:** Умо́въ ли́цы и всѣхъ святы́хъ собо́ръ чту́тъ Тя, Влады́чице: безплотнаго бо Бо́га Сло́ва, Его́же ужа́саются а́нгелы, воплотила еси́ и была́ еси́ Ма́терь Бо́жія, пре́жднія вражды́ средостѣ́ніе Рожде́ствомъ Твои́мъ едина́ разторгшая.

**Инъ.**

**Ирмо́сь:** *Божественное сіе и всечестное совершающе празднество, богомудри, Богоматере, приидите, руками восплецимъ, отъ Нея́ рождшагося Бо́га сла́вимъ.*

**П**очести трудо́въ, всепреподобни́и отцы́ двадеса́ть и ше́сть, прія́сте, пострада́вше, и благода́тными дарова́ньми ва́сь вѣнцедаве́ць Христо́сь украси́.

**И**хже о́ко не возмо́же ви́дѣти, и у́хо слы́шати, всесла́внии, и у́мъ челоуѣ́ческой разумѣ́ти, я́коже писа́ся, си́хъ на небесѣ́хъ въ жре́бїи сподо́бистеся.

**О**бители Зогра́фскїя храні́тели, предста́тели и покрові́тели, дне́сь восхва́лимъ преподо́бнострада́льныя два́десять и ше́сть, пра́зднественное составля́юще торже́ство.

**П**а́мьять ва́шу благознамені́тую соверша́юще, преподо́бнострада́лнии, дне́сь, мо́лимъ обі́тель сію́ и ино́чествующія соблюди́те и изба́вите отъ скорбе́й.

**Богородиче́нь:** Разлі́чная дарова́нія иму́ще, отцы́, разлі́чныхъ напа́стей на́сь изба́вите, и сомо́литвенники Влады́чицу и Косму́ прї́ймше, па́ству ва́шу соблюди́те.

**Конда́къ, гла́сь 8. Подобе́нь:** Взбра́нной.

**О**бители на́шея предста́тели и храні́тели, свяще́нныя преподо́бнострада́льцы два́десять и ше́сть, лати́нскую горды́ню низложи́вшїя, и о́гненное сожже́ніе претерпѣ́вшїя, и вѣнча́нныя досто́йно, восхва́лимъ, вопію́ще: ра́дуйтеся, преподо́бнострада́лнии.

## **Икосъ:**

**А**нгелы удиви́шася, съ небесе́ зря́ще безбо́жное стремле́нiе лати́нь, како́ преподо́бныя во огни́ испепеля́ху благочесті́я ради; иже и умре́ти благочестно́ изво́лиша, и мучи́телеву бровь́ низложи́вше, слы́шатъ отъ насъ такова́я: ра́дуйся, ли́че преподо́бнострада́льныхъ; ра́дуйся, твёрдое ополче́нiе многострада́льныхъ; ра́дуйся, двадца́тице съ шестери́цею преподо́бныхъ; ра́дуйся, Ѳомо́, съ прочими́ мученики; ра́дуйся, божественный Варсану́фіе съ Михее́мъ твёрды́мъ; ра́дуйся, Домети́ане, Ми́но съ Па́вломъ свѣ́тлымъ; ра́дуйся, со Анто́ніемъ Евѳи́міе и Илари́оне; ра́дуйся, съ Парѳе́ніемъ, Си́моне и Ю́сифе; ра́дуйся, двои́це Іа́кововъ кúпно съ Іоанни́кіемъ; ра́дуйся, Марти́ніане, кúпно съ Космо́ю и Сѣ́ргіемъ; ра́дуйся, Кипри́ане, Кири́лле, Ю́ве и Са́вво сла́вни; ра́дуйся, четвери́це сла́вная свѣ́тлыхъ страстоте́рпцевъ; ра́дуйтесь, преподо́бнострада́льни.

## **Пѣснь 7.**

**Ирмо́сь:** *Отроцы, благочестію совоспита́ни, злочестиваго вельнiя небре́гше, о́гненнаго прещѣ́нiя не убоя́шася, но, посреди́ пла́мене стоя́ще, пояху: отце́въ Бо́же, благослове́нь еси́.*

**Н**аста нынѣ божественная и радостная память ваша, преподобнострадальнии, веселящая и освящающая всѣхъ, чтущихъ подвиги и страдания ваша, и поющихъ: отецъ нашихъ Боже, благословенъ еси.

**О**гню приобщающесе, попалисте прелесть противобожную, преподобномученицы Христовы, изобличающе лютое латинъ о Дусѣ приложение, и поюще: отецъ нашихъ Боже, благословенъ еси.

**В**ся, яже въ мѣрѣ, и тѣлесѣ и богатство презрѣша, будущія ради жизни, добліи преподобнострадальцы, и умерше со Христомъ, нынѣ царствуютъ въ неприступномъ свѣтѣ и невечернѣмъ.

**Богородиченъ:** Молѣбную нашу пѣснь нынѣ, Богородице, всѣхъ, воспѣвающихъ, Приснодѣво, лютыхъ измѣняючи, съ любовію ко Господу вопіющихъ: отецъ нашихъ Боже, благословенъ еси.

**Инъ.**

**Ирмосъ:** *Не послужиша твари богомудри, паче Создавшаго, но, огненное прещеніе мужески поправше, радовахуся, поюще: препѣтый отецъ Господь и Богъ, благословенъ еси.*

**В**озлюбивше Бога якоже мощно, преподобнии, и поучившися въ Божественномъ Его законѣ, достойно нынѣ почитаются.

**Д**а совосплещуть нынѣ съ земными небесная, да возвеселятся со ангелы естество человеческое. Человѣцы бо небеснии, ангелы земнии, небомудреннии отцы, пострадавшие доблественно, празднуемы суть.

**У**блажаются, отцы, подвиги ваши и борения, имиже честная пріятельца Духа явистесь, якоже ангелы пострадавшие за правое мудрование и почитаетесь во вѣки.

**Богородичень:** **Б**лагочестно воспѣвающихъ Тя, Богородицу, Госпоже Владычице, грѣховнаго лютаго мрака скоро премени, молимся, части же и радости Тобою просвѣщенныхъ, сподоби.

## **Пѣснь 8.**

**Ирмосъ:** **Ч**уда *преестественнаго* *росодательная* *изобрази* *пещь* *образъ:* *не бо, яже* *пріять,* *палить* *юныя,* *яко ниже* *огнь* *Божества* — *Дѣвы,* *въ Нюже* *вниде* *утрѣбу.* *Тѣмъ,* *воспѣвающе,* *воспоёмъ:* *да благословитъ* *тварь* *вся* *Господа* *и* *превозноситъ* *во* *вся* *вѣки.*

**Н**ынѣ священная обитель Зографская хвалится, богоноснии, и, красящися, чудесь вашихъ наслаждается, и величается страданьми и подвигами вашими: папослужителей бо

посрамісте, православными сопротивляющесе имъ догматами, и пѣснословяще Христа во вѣки.

**Пѣсньми** да воспоется священный Ѳома, игумень обители Зографскія, Варсануфій, и Иларіонъ, и Косма, и Сѣргій, и Евѡимій, и Мина, и Іаковъ, Іовъ, Іоаннікій, съ ними же и прочее честное собраніе, двадесять и шести, поюще Господа и превозносяще Его во вѣки.

**Спасай** рабы Твоя, Великодержавный Царю, Боже, еди́не Щедре, многими моленьми преподобныхъ Твоихъ срадальцевъ, двадесять и шести, преклоняемъ нынѣ. Съ ними же и насъ приими, вопіющихъ: да благословитъ вся тварь Господа и превозноситъ во вся вѣки.

**Богородичень:** Яко трапѣза Хлѣбъ жизни вмѣстила еси, всѣхъ питающей, Отроковице, вседѣтельнымъ осѣненіемъ, и Сего дойши сосцы, яко Младенца, Егоже поюще, яко Бога, Тебе господственно, Богородицу, возвѣщаемъ: да благословитъ вся тварь Господа и превозноситъ во вся вѣки.

### **Инъ.**

**Ирмосъ:** *Отроки благочестивыя въ пещи Рождество Богородичо спасло естъ, тогда убо образуемое, нынѣ же дѣйствуемое, вселенную всю воздвизаетъ пѣти Тебѣ: Господа пойте, дѣла, и превозносите Его во вся вѣки.*

**С**осуды избраннии, чеснии, явльшися, свѣтло горнѣ сїяніе прїясте, и къ селеніемъ истинно небеснымъ радостно потекосте, облистаети благодарїю Божественныя Троицы, Юже пѣсньми поете во вся вѣки.

**Р**авное совершивше теченіе, отцы преподобнострадальнии, и равная праведнымъ вѣнцы отъ Христа прїясте на небесѣхъ, блаженнии, Ѳомо со всѣми, срадуящися ангельскимъ ликомъ, память убо творите о благохвалящихъ васъ.

**Троичень:** Со всѣми горними воинствы, Отца и Сына и Духа Святаго, трисвѣтлое, нераздѣльное, несозданное Божество, единое властительное, начальство и царство пѣснословяще: Святъ, Святъ, Святъ, вопіемъ неусыпною любовію.

**Богородичень:** Словесы и догматы, Дѣво, Чистую Богородицу Тя проповѣдавши, Бога во плоти неизреченно родившую; и человѣческое Обожившаго естество въ ложе снахъ Твоихъ, пѣсньми да чтутся достойно съ Тобою, Богородице, двадесять и шесть отцевъ.

## **Пѣснь 9.**

**Ирмосъ:** *Свѣтоносный облакъ, въ онъже всѣхъ Владыка, яко дождь съ небесъ на руно, сниде и воплотися насъ ради, бывъ Человѣкъ,*

Безначальный, величаемъ вси яко Матерь Бога нашего Чистую.

**П**ослѣдующе, отцы, благоговѣнно и преподобно пожившимъ на земли, во обители Зографстѣй постнически лукаваго побѣдите, и пострадасте за благочестіе, сего ради нынѣ васъ восхваляемъ.

**О**тъ устенъ нечистыхъ, нынѣ убогое пріемше пѣніе, о насъ ко единому Владыцѣ память творите прилжно, твердіи преподобнострадальцы, яко да обрящемъ прегрѣшеній разрѣшеніе, и почитаемъ память вашу свѣтло.

**Я**коже солнце великое священная ваша память, просіявши ясно, озаряетъ міръ, юже совершающе благоговѣнно, почитаемъ васъ, отцы преподобнострадальнии, яко представителей, хранителей же и блюстителей обители нашея.

**Я**ко благоуханни шипцы, яко чистѣйшія кринны, яко древеся присноцвѣтущая и дышущая мѣра, отъ честныхъ ваша раки источаете безчисленная исцѣленія, всепреподобнии, прогоняюще злосмрадное недуговъ, съ вѣрою и благоговѣніемъ приступающимъ къ вамъ.

**Богородичень:** Купина прообразоваше, Дѣво, Твое преславное чудо: Ты бо пріяла еси во

утрѣбѣ́ Огнь нестерпимый войстинну, чревоносившая Христа, правды Солнца сущаго, неопалима пребывши, тѣмже Тя присно блажимъ.

### **Инь.**

**Ирмосъ:** *Всякъ земнородный да възграется, Духомъ просвѣщаемъ, да торжествуетъ же безплотныхъ умовъ естество, почитающее священное торжество Богоматере, и да вопіетъ: радуйся, Всеблаженная Богородице, Чистая Приснодѣво.*

**В**о свѣтѣ мысленнѣмъ, мудрии, водворяющесе, пѣснь пріимите, юже вамъ приносимъ, многаго ради долга, имже должи есмы, и воздаянія просимъ прегрѣшеній оставленію дароватися, вашими молитвами, достойно васъ почитающимъ.

**П**оложи васъ Богъ, преподобнострадальни, яко незыблемая обители сей предстолпія, въ послѣдняя времена, на непримиримыя враги. Кости же ваша всечестныя, яко камень претыканія сопротивнымъ даде, православную вѣру присно укрѣпляя, славни.

**У**толите бурю лютыхъ варваръ, воздвизаемую на насъ, всепреподобни, уставите церковныя раздоры, пѣвцемъ даруйте прегрѣшеній

оставленіе, обитель же невредиму сохраните отъ всякаго лютаго обстоянія.

**Троичень:** Всевышній Боже, Отче, Сыне, и Душе, Троице равночестная, молитвами преподобныхъ Твоихъ, сохраняй священную обитель нашу отъ всякаго озлобленія, паствѣ же Твоей непоколебимое, непреклонное и мирное подаждь состояніе.

**Богородичень:** Тя, яко воистинну, пріятелище Духа явилася еси, Владычице: Бога бо, Егоже небо и земля вмѣстити отнюдь не можетъ, во чревѣ Твоемъ вмѣстила еси. Сего умилостиви, преподобныхъ и Твоими молитвами, о всѣхъ насъ, воспѣвающихъ Тя.

**Свѣтилень. Подобенъ:** Женѣ, услышите.

Обители нашея предстатели, днесь свѣтло восхвалимъ преподобнострадальныя отцы, низложители прелести латинъ и проповѣдники вѣры православныя, иже огнемъ испепелившеся, всеожженія божественная принесостеся Троицѣ.

**Слава:**

Предстателей васъ, премудри, стяжахомъ и хранителей священныя обители нашея, тѣмже свѣтло совершаемъ память вашу благознаменитую, пѣснями васъ почитающе: вы

бо, Гóспода просла́вьше, ны́нѣ досто́йно со  
а́нгелы почита́еми естé.

### **И ны́нѣ, богорóдиченъ:**

**В**сецари́це Богоневѣ́сто, Благословéнная  
Влады́чице, Мати́ Царéва, цвѣ́те дѣ́вства,  
а́нгеловъ благолѣ́піе, небéсныхъ украшéние,  
вели́кое прибѣ́жище, поёмъ Тя́, Пресвятáя, я́ко  
Спаси́тельницу мíра.

### **На хвалíteхъ стихи́ры на 4, гла́сь 1.**

#### **Подóбенъ: Небéсныхъ чинóвъ.**

**П**риидите́, вѣ́рнии, и безсупру́жныхъ ли́цы,  
соше́дшеся, до́бля Христо́вы ору́жники, и  
свѣти́льники Правосла́вия, твѣ́рдья  
преподобнострада́льцы два́десять и шéсть,  
восхва́лимъ пѣ́сньми, симъ съ вѣ́рою вопію́ще: о  
на́съ Спа́са моли́те.

**З**емна́я попечéнія оттря́сше, во обители́  
Зогра́фствѣ́й подвиза́ющеся, отцы́, пострада́те  
до́блественно отъ лю́тыхъ зломудренныхъ, я́ко  
храните́ліе отéческихъ предáній, и сугубы́я  
вѣ́нцы прія́сте.

**С**ъ радостнымъ сѣ́рдцемъ и твѣ́рымъ  
пóмысломъ на столпѣ́ стоя́ще, изобличíte  
прéлесть лю́тыхъ латиномудренныхъ, и огнѣ́мъ  
сожжéни бѣ́вше, принесóстеся преподо́бнии, я́ко  
прія́тныя всесожжéнія Влады́цѣ, велича́еми.

**В**ѣрою совершающія память вашу, двадцать и шесть, добліи Христовы воины, сохраняйте отъ всякаго вреда и враговъ видимыхъ же и невидимыхъ, преподобніи, и небеснаго Царствія сподобите.

### **Слава, гласъ 1:**

**К**іими глаголы пѣніе вамъ принесемъ, отцы преподобнострадальніи? Или кіими похвальными пѣснями восхвалимъ васъ? Множество бо устенъ недовлѣетъ къ сему, много же паче единъ и неискусный, но аще же и не по достоянію, обаче отъ насъ услышите сія: радуйтеся, Православія поборницы, пріятелища добродѣтели, монашествующихъ утверждение, и основаніе вашей обители; радуйтеся, демоновъ прогонителіе, злославныхъ противоборницы, наставницы заблуждающихъ извѣстніи, Троицы всечестная селенія; радуйтеся, многотекущіи окріны мѣра благовоннаго, арамаговъ приснотекущія рѣки, Святыя Горы предстолпія, вѣчныхъ благъ наслѣдницы, молитесь о насъ, любовію совершающихъ всечестную память вашу.

### **И нынѣ:**

**М**олитвами, Господи, всѣхъ святыхъ и Богородицы, [Твой миръ даждь намъ, и помилуй насъ, яко единъ Щедръ].

**Славословіе великое, [ектениі] и отпусть.**

**НА ЛИТУРГИИ:**

**Блаженна отъ канона, пѣснь 3-я и 6-я. [Прокимень, гласъ 7: Восхвалятсѧ преподобнии во славу и возрадуютсѧ на ложахъ своихъ. Стихъ: Воспойте Господеву пѣснь нову, хваление Его въ церкви преподобныхъ. Апостолъ ко Евреемъ, зачало 334. Аллилуія, гласъ 4: Возвѣща праведнии и Господь услыша ихъ, и отъ всѣхъ скорбей ихъ избави ихъ. Стихъ: Мнози скорби праведнымъ и отъ всѣхъ ихъ избавитъ я Господь. Евангеліе Іоанна, зачало 35 отъ полу. Причастенъ: Радуйтеся праведнии о Господѣ, правымъ подобаетъ похвала.]**

**Конѣцъ и Богу слава.**

**Источникъ: Служби на българските светии. — Света Гора, Атон: Славянобългарски манастир «Св. Вмчк Георги Зограф», 2007. — Л. 439-459.**

